

ÁLYKTUN ALLSHERJAR- OG MENNTAMÁLANEFNDAR

Allsherjar- og menntamálanefnd fjallar um mennta- og menningarmál, vísinda- og tæknimál og nýsköpun í atvinnulífinu. Auk þess fjallar nefndin um dóms- og löggæslumál, mannréttindamál, ríkisborgararétt og málefni útlendinga, neytendamál, málefni þjóðkirkjunnar og annarra trúfélaga, jafnréttismál og málefni fjölmiðla og fjölmiðlunar.

MENNTA- OG MENNINGARMÁL

Almennt umbótastarf á sviði menntamála

Hagvöxtur, bætt lífskjör og samkeppnishæfni Íslands byggja á menntun og vísindastarfi. Góð menntun er grundvallarforsenda jafnra tækifæra og lykill að lífsgæðum einstaklinga, opnu samfélagi og er forsenda öflugs atvinnulífs og samkeppnishæfni. Auka þarf námsframboð og fjölga sjálfstætt starfandi skólum. Miklar breytingar eru að verða á atvinnulífi og vinnumarkaði sem færa okkur í senn nýjar áskoranir og tækifæri, bæði fyrir fyrirtæki og einstaklinga. Þar má nefna öra þróun þekkingar og tækni með þeirri auknu sjálfvirknivæðingu sem 4. iðnbyltingin hefur í för með sér, bæði innanlands og á alþjóðamarkaði, stóraukinn fjöldi innflytjenda á íslenskum vinnumarkaði og breytta aldurssamsetningu þjóðarinnar.

Fjöldi núverandi starfa mun úreldast og ný verða til. Slíkt hefur jafnframt þá hættu í för með sér að þeir sem í dag sinna störfum sem munu hverfa, missi hæfni sína til þátttöku á vinnumarkaði. Því er fjölbreytilegt, skapandi og hagkvæmt menntakerfi lykillinn að kraftmiklu og arðskapandi atvinnulífi þar sem fólk mun þurfa að mennta sig alla ævina með sí- og endurmenntun.

Fjölbreytt rekstrarform, nýsköpun og minni miðstýring í skólustarfi er mikilvægur þáttur í að auka gæði menntakerfisins. Auka þarf gæðamat og gera samræmda mælikvarða til að meta árangur skóla og skólastiga.

Mælingar á gæðum í íslensku skólustarfi benda til þess að ýmsu sé ábótavant, einkum á grunnskólastigi. Má í því samhengi nefna niðurstöður PISA kannana og sérstaklega námsárangur ungra drengja. Leggja þarf aukna áherslu á lestur, stærðfræði og náttúruvísindi til að tryggja að íslenskir nemendur séu ekki eftirbátar í alþjóðlegu tilliti og til að bæta gæði skólustarfs. Fjármálalæsi er einnig mikilvæg grundvallarfærni sem skilar sér í auknum skilningi, betri ákvarðanatöku og fjárhagslegri ábyrgð einstaklinga, sem stuðlar aftur að aukinni hagsæld.

Athuga þarf sérstaklega stöðu drengja í skólakerfinu, en þriðjungur drengja getur ekki lesið sér til gagns við útskrift úr grunnskóla og drengir eru einungis þriðjungur af nýnemum í háskólum. Skoða þarf þarfir þeirra og brotalamir skólakerfisins gagnvart þeim og líta þarf til lausna eins og aukinnar kennslu í gegnum verklegt nám og í leik. Einnig þarf að auka frelsi í námsvali og miðla þarf grunnfærni með því að virkja áhugasvið og draga úr áherslum við lærdóm eftir fastri forskrift. Skoða þarf

hvatastrúktúr kennara til þess að stuðla að nýsköpun í skólakerfi. Þá þarf að fjölga karlmönnum í kennarastétt.

Huga þarf betur að uppbyggingu náms fyrir nemendur með íslensku sem annað mál því árangur þeirra og atvinnuþátttaka auk aðlögunar að íslensku samfélagi er mikilvæg. Innan þessa hóps er hlutfall þeirra sem ekki lesa sér til gagns mun hærra en gerist hjá nágrannaþjóðum og brotthvarf úr framhaldsskóla er einnig mjög hátt. Öll merki eru um að nemendum almennt, sem eru með íslensku sem annað mál, sé alls ekki sinnt með viðunandi hætti. Gera þarf sérstakt átak í málefnum barna af erlendum uppruna.

Skýr stefnumörkun sem lýtur að því að íslensk börn og ungmenni standi jafnfætis jafnöldrum sínum í alþjóðlegum samanburði er lykilþáttur í þróun menntakerfisins. Leggja ber áherslu á að vinna með nemendum, kennurum og öðrum hagsmunaaðilum að breytingum og umbótum á íslensku menntakerfi.

Bregðast þarf við fækkun nemenda í kennaranámi. Bæta þarf starfsumhverfi þeirra og breyta launakerfi stéttarinnar þannig að skólastjórnendur hafi meira svigrúm til að semja við starfsmenn á einstaklingsgrundvelli. Horfa þarf hér sérstaklega til nýrra áskorana og tækifæra í kennaramenntun á tímum mikilla tækniframfara.

Gera þarf úttekt á áhrifum lengingar kennaranáms og í kjölfarið endurmeta tilhögun þess með það að markmiði að auka gæði námsins og gera það eftirsóknarverðara. Eðlilegt er að tiltekin starfsréttindi kennara fáist eftir þriggja ára grunnám á háskólastigi. Tveggja ára meistaranám og vettvangsnám/starfsnám taki síðan við, þar sem lögð er áhersla á rannsóknir og sérhæfingu eins og gildir í flestum öðrum námsgreinum. Leggja ber meiri áherslu á stjórnunarhlutverk skólastjórnenda sem rekstraraðila, mannauðsstjóra og leiðtoga ásamt því að auka sjálfstæði skóla með minni miðstýringu.

Leikskóli, grunnskóli og framhaldsskóli

Efla þarf tengsl og sveigjanleika á milli skólastiga þannig að nemendur geti færst auðveldlega þar á milli í því augnamiði að nemendum á unglíngastigi grunnskólanna standi til boða val um námshraða. Enn fremur standi nemendum grunnskólanna til boða að stunda framhaldsskólaáfanga í fjarnámi samhliða grunnskólanáminu sér að kostnaðarlausu. Börnum sem ná ákveðnum árangri skal bjóðast að útskrifast ári fyrir. Styttingu náms á grunn- og framhaldsskólastigi og aukin skilvirkni í menntakerfinu fylgir mikill þjóðhagslegur ávinningur. Á sama tíma þarf að sporna gegn brotthvarfi með því að bæta gæði náms, auka tengsl atvinnulífs við skóla og tryggja fjölbreytni bæði í bók-, list- og iðnnámi svo að nemendur verði betur í stakk búnir að velja nám við hæfi er grunnskóla sleppir. Brotthvarf úr skólum á Íslandi er vandamál sem þarf að vinna á strax og grípa snemma á grunnskólastigi til aðgerða til aðstoðar nemendum. Að sama skapi þarf að efla náms- og starfsráðgjöf svo að nemendum sé betur ljóst hvaða fjölbreyttu valkostir eru á framhaldsskóla- og háskólastigi. Greiða þarf leið brotthvarfsnemenda aftur til náms m.a. með því að styðja við frumgreinadeildir háskólanna og þá nýsköpun í íslensku menntakerfi sem er að verða til með sjálfstæðum

einkareknum lýðháskólum. Samkvæmt hvítbók um umbætur í starfsmenntun var gerð áætlun um átak til eflingar starfsmenntunar á árunum 2015-2019. Lagt er til að þessu átaki verði fylgt eftir. Ráðuneyti mennta- og menningarmála hefur ýtt úr vör verkefni til að skýra ábyrgð á stjórnslu starfsmenntunar, greina hlutverk ólíkra aðila og stuðla að meiri skilvirkni starfsmenntakerfisins. Markmiðið er endurskoðun á stjórnun og stjórnslu starfsmenntunar. Styðja ber við þessi áform ráðuneytisins.

Skólastarf þarf að þróast í takt við tækniframfarir á hverjum tíma. Það tengist bæði námsgagnagerð, miðlun upplýsinga og gagna og síðast en ekki síst breyttum kennsluháttum. Ný tækni getur umbylt ferlum í skólum og eflt fjarkennslu sem aftur getur lækkað kostnað og bætt gæði. Miðstýring má ekki koma í veg fyrir frumkvæði, nýsköpun og frelsi til að tileinka sér ný vinnubrögð. Framhaldsskólar megi bjóða upp á lengra nám en 3 ár með sérstökum samningum þar um.

Efla þarf námsgagnaútgáfu, auka rannsóknir á sviði kennslu og menntamála. Einnig þarf að efla þróunar- og endurmenntunarsjóði sem styðja við skólaþróun og sjálfstæði skóla ásamt því að stofna upplýsingatæknisjóð til að styðja við nýsköpun og menntatækni í skólum. Stórefla þarf námssjóð í þeim tilgangi að veita styrki til fyrirtækja vegna vinnustaðanáms og starfsþjálfunar nemenda í iðnnámi. Ríkið ætti ekki að standa í útgáfu námsefnis heldur opna markaðinn fyrir allt námsefni skv. ákveðnum gæðakröfum og bjóða út gerð námsefnis þegar ríkið á hlut að máli.

Skóli án aðgreiningar er flókinn í framkvæmd og skapar mikið álag fyrir starfsfólk, nemendur og aðstandendur. Stefnan þarf að vera framkvæmanleg og því mikilvægt að meta faglega kosti og galla þessa fyrirkomulags, ekki síst fyrir nemandann sjálfan, ánægju hans og árangur. Styðja á við stoðþjónustu grunnskóla til þess að koma til móts við fjölbreytta nemendahópa með bættri þjónustu og auknu aðgengi að sérhæfðri aðstoð fyrir börn sem þurfa sérstök úrræði.

Bjóða skal uppá valfrelsi í skólakerfinu og að heimilt verði að reka skóla sem veita sérhæfða aðstoð og þjónustu svo sem fyrir bráðgerð börn eða þau sem þurfa sérstök úrræði og standa höllum fæti.

Leikskólinn er fyrsta skólastigið. Tryggja verður að hann geti staðið undir þeim faglegu kröfum sem gerðar eru til hans. Hlúa þarf vel að börnum og starfsmönnum, bæta starfsumhverfið og auka sveigjanleika í starfi og dvalartíma barna. Horft verður til meiri fjölbreytni í starfsemi leikskólanna til að mæta manneklu. Í því skyni mætti auka samstarf íþróttafélaga og þeirra aðila sem bjóða upp á tómskundastarf með námskeiðahaldi á leikskólanum. Þannig gæfist auk þess nemendum leikskólanna tækifæri á að kynnast fjölbreyttum tómskundum. Brúa þarf bilið milli fæðingarorlofs og leikskóla. Sveitarfélög skulu gefa foreldrum kost á að fá umbun ef þeir nýta ekki þjónustu leikskóla svo þeir geti haft val um hver annast börn þeirra.

Háskólar, vísindi og nýsköpun

Menntun, vísindi og nýsköpun er aflvaki uppbyggingar og þróunar atvinnulífs. Starfsemi háskóla og rannsóknarstofnana gegnir lykilhlutverki við að tryggja bætt lífsgæði til frambúðar. Rannsóknir og nýsköpun er mikilvægt hlutverk háskóla og sérstaklega ber að styðja við frumkvöðla- og nýsköpunarstarf og hvetja til sterkra tengsla við atvinnulífið. Ákveðnar atvinnugreinar hafa verið vanræktar hvað rannsóknarstarf varðar svo sem landbúnaður og ferðaþjónusta en aðrar greinar hafa verið til fyrirmyndar svo sem sjávarútvegur. Bæði háskólar og viðkomandi atvinnugreinar þurfa að huga betur að þessum þætti.

Fjárfesting í menntun er ein meginstoð verðmætasköpunar sérstaklega á tímum þegar umtalsverð breyting á sér stað í atvinnulífinu. Íslenskir háskólar þurfa aukið fjármagn á hvern nemanda til að halda uppi gæðum og standast alþjóðlega samkeppni. Veita þarf opinberum háskólum aukna heimild til innheimtu hóflegra skólagjalda og stýra betur fjölda nemenda í námi.

Auka þarf samvinnu og samhæfingu íslenskra háskóla- og rannsóknarstofnana. Endurskoða þarf hlutverk rannsóknarstofnana og meta hvort starfsemi þeirra sé í takt við nútímaþarfir háskóla og atvinnulífs. Skoða ber sameiningar háskóla og rannsóknarstofnanna í því ljósi, en sameiningar verða að skila faglegum ávinningi ekki síður en fjárhagslegum.

Sá rammi sem mótaður er um starfsemi háskóla má ekki draga úr frelsi þeirra til sjálfstæðrar starfsemi og stjórnunar. Samstarf og samkeppni þarf að haldast í hendur. Gott samstarf við erlenda háskóla mun laða að íslenska og erlenda námsmenn og kennara með það að markmiði að styrkja stöðu háskólastarfsemi á Íslandi.

Taka skal Lánasjóð íslenskra námsmanna og lánakerfið til endurskoðunar og halda áfram vinnu sem byggir á áður framkomnu frumvarpi. Það er að norrænni fyrirmynd sem jafnar stöðu nemenda, tekur mið af breyttum þörfum atvinnulífs og er árangurshvetjandi.

Íþróttastarf

Viðhalda þarf öfluggu íþróttastarfi í landinu. Styðja þarf við íþróttir á öllum stigum og iðkendur þurfa hvatningu og stuðning til þátttöku enda hefur íþróttastarf mikið forvarnargildi. Halda þarf áfram áformum um byggingu nýs þjóðarleikvangs í Laugardalnum.

Auka þarf samfellu í skóla og tómstundastarfi barna. Hreyfing og tómstundastarf er forvörn og þarf að tengjast menntakerfinu almennt. Bæta þarf möguleika almennings til heilsuræktar. Áhersla verði á lýðheilsu með góðri aðstöðu fyrir almenningsíþróttir.

Menning

Tryggja þarf áframhaldandi grósku í íslensku menningarlífi um allt land sem hefur mikil hagræn áhrif og nýta tækifærin sem felast í menningar- og listalífi. Varðveita þarf sögu og menningararf og vernda íslenska tungu. Íslenska málsvæðið er lítið og stuðningur því nauðsynlegur. Verja þarf stöðu tungunnar í heimi upplýsingatækni og gervigreindar.

Leita þarf leiða til að skapa samkeppnishæft umhverfi löglegra efnisveitna þar sem reynslan sýnir að aðgengi að löglega fengnu afþreyingarefni dregur til muna úr ólöglegu niðurhali.

Endurskoða þarf starfs- og heiðurslaunakerfi listamanna þannig að það sé sanngjarnt, hvetjandi og skili þeim árangri sem til er ætlast.

Leggja ber niður mannanafnanefnd í núverandi mynd og endurskoða lög um mannanöfn til þess að gefa foreldrum meira frelsi til að gefa börnum sínum nafn en jafnframt standa vörð um íslenska mannanafnahefð.

Styðja þarf við öflugt lista- og menningarstarf og auka þátttöku allra aldurshópa í menningartengdri starfsemi.

Fjölmiðlar

Rekstur fjölmiðla og fjárhagslegur grundvöllur þeirra er mikilvægur lýðræði, gegnsæi og trúverðugleika í samfélaginu. Endurskoða þarf hlutverk ríkisútvarpsins með það að markmiði að þrengja verksvið þess í ljósi breytinga sem orðið hafa á fjölmiðlamarkaði. Rekstur ríkisins á fjölmiðlum má ekki hamla frjálsri samkeppni og raska rekstrargrundvelli annarra fjölmiðla. RÚV á að fara af auglýsingamarkaði.

Horfa þarf m.a. til ýmissa tillagna sem koma fram í nýlegri fjölmiðlaskýrslu og hrinda þeim í framkvæmd. Afnema ber virðisaukaskatt af fjölmiðlum, bæði til að styrkja rekstur þeirra og samræma skattaumhverfi. Auka þarf almennt gegnsæi í eignarhaldi fjölmiðla og tryggja áreiðanleika skráningar.

RÚV þarf að leggja aukna áherslu á sérstöðu sína, m.a. gagnvart öðrum miðlum. Það endurspeglast m.a. í því að leggja aukna áherslu á innlent efni á kostnað erlends afþreyingarefnis.

Styðja þarf við framleiðslu á vönduðu íslensku sjónvarpsefni á íslenskri tungu, sérstaklega því sem er miðað að börnum og ungmennum.

Mannréttindi

Sjálfstæðisflokkurinn byggir stefnu sína á mannréttindum, jafnfræði, frelsi og ábyrgð einstaklingsins. Allir eiga að fá notið mannréttinda án tillits til uppruna, þjóðernis, stéttar, tungumáls, litarháttar, trúarbragða, lífs- eða stjórnmalaskoðana, kyns, kynhneigðar, aldurs, fötlunar, holdafars, líkamsgerðar, heilsufars, atgervis eða annarrar stöðu.

Öllum er heimilt að aðhyllast og iðka hvaða trú sem er, skipta um trú eða hafna öllum trúarbrögðum. Trúfrelsi telst til almennra mannréttinda eins og málfrelsi og atvinnufrelsi. Þjóðkirkjan hefur haft bæði sögu- og menningarleg áhrif á íslenskt samfélag. Frekari aðskilnað ríkis og kirkju þarf að framkvæma með farsæld þjóðarinnar að leiðarljósi. Ljúka þarf við endurskoðun á fjárhagslegu sambandi ríkis og kirkju.

Sjálfstæðisflokkurinn á áfram að vera leiðandi í málefnum sem snúa að vernd eignaréttar og almennum borgaralegum réttindum hvort sem um er að ræða málefni hinsegin fólks, fatlaðra, útlendinga eða annarra aðila. Sjálfstæðisflokkurinn hafnar hvers kyns ofbeldi. Leggja ber áherslu á forvarnir og styðja félagasamtök og stofnanir sem vinna gegn ofbeldi. Þar til bærar stofnanir ríkis og sveitarfélaga þurfa að aðstoða betur fjölskyldur og einstaka brotþola í því sambandi.

Gera þarf enn betur í réttarvörslukerfinu þegar kemur að þolendum ofbeldisbrota, einkum kynferðis- og heimilisofbeldis. Nýrri aðgerðaráætlun um meðferð kynferðisbrota í réttarvörslukerfinu hefur verði hrint í framkvæmd og fjármögnuð að fullu. Brýnt er að fylgja henni fast eftir. Styttu þarf málsmeðferðartíma og setja kynferðisbrotamál í forgang í réttarvörslukerfinu, skilgreina hlutverk réttargæslumanns brotþola betur svo þjónustan sé samræmd, skýr og brotþolanum til gagns. Auka þarf þátt rafrænnar stjórnýslu í réttarvörslukerfinu.

Sjálfstæðisflokkurinn vill huga sérstaklega að réttindum ungs fólks.

Lagt er til að áfengiskaupaaldurinn verði lækkaður í 18 ár, þannig að einstaklingum sem samkvæmt lögum eru lögráða (sjálfráða og fjárráða) verði heimilt að kaupa áfengi eins og aðrar neysluvörur.

Málefni hinsegin fólks

Sjálfstæðisflokkurinn vill halda áfram að vera leiðandi í málefnum hinsegin fólks og vill koma Íslandi í fremstu röð í málefnum þess með metnaðarfullri löggjöf um kynrænt sjálfræði. Í þeim lögum yrði kveðið á um að einstaklingar megi sjálfir ákveða kyn sitt. Kynvitund og kyngervi þeirra njóti viðurkenningar, einstaklingar njóti líkamlegrar friðhelgi og jafnréttis fyrir lögum óháð kynhneigð, kynvitund, kyneinkennum og kyntjáningu.

Málefni innflytjenda og útlendinga

Taka þarf vel á móti þeim sem leita hælís á Íslandi og eiga rétt á að komast í skjól. Nýta þarf mannauð, þekkingu og reynslu innflytjenda sem vilja búa og starfa hér á landi. Þannig er samkeppnishæfni landsins betur tryggð. Einfalda þarf ferli við veitingu atvinnuleyfa fyrir fólk utan Evrópska efnahagssvæðisins og tryggja greiðari leið þeirra sem vilja leita nýrra tækifæra og betra lífs á Íslandi. Fjölbreyttara samfélag kallar á fjölbreyttari valkosti fyrir alla.

Ekki má láta átölulaust að hingað komi fólk frá öruggum ríkjum í þeim tilgangi að misnota réttindi fólks sem er á flóttu frá raunverulegri neyð. Mikill árangur hefur náðst við styttingu málsmeðferðartíma umsókna um alþjóðlega vernd að undanfögnu og við að hraða brottför þeirra sem sækja um vernd að tilhæfulausu.

Miklar réttarbætur hafa verið gerðar hér á landi í þágu útlendinga, bæði þeirra sem leita alþjóðlegrar verndar og kvótaflóttamanna sem og annarra útlendinga. Við móttöku flóttamanna og innflytjenda verður einnig að gera þá kröfu að innviðir samfélagsins svo sem heilbrigðis- og félagsþjónusta séu viðunandi svo veita megi þeim sem hingað leita úr erfiðum aðstæðum þá aðstoð sem þarf. Taka þarf búsetuúrræði og menntun barna á flóttu ásamt annarri aðlögun að íslensku samfélagi fastari tökum. Útlendingalöggjöfina þarf að þróa áfram af ábyrgð og raunsæi.

Jöfn tækifæri og jafnrétti

Sjálfstæðisflokkurinn vill tryggja jöfn tækifæri allra og fjárhagslegt sjálfstæði einstaklinga sem er grundvöllur jafnréttis. Jafnrétti framar jöfnuði. Það er ekki hlutverk stjórnvalda að jafna hag manna með valdboði heldur tryggja að sem mest sé til skiptanna og að umbun fylgi árangri. Þegar árangur og atorka einstaklinga er metin að verðleikum í leik og starfi miðar þjóðfélaginu hraðast fram á veg. Á sama tíma er stutt við þá sem standa höllum fæti.

Löggjöf og leikreglur í viðskiptum og daglegu lífi skulu vera skýrar, einfaldar og sanngjarnar. Tryggja þarf að eftirlit sé skilvirklegt gegn sviksemi í viðskiptum og skattskilum.

Löggæsla og fullnusta refsingar

Eitt af meginhlutverkum ríkisvaldsins er að tryggja öryggi borgaranna, vernda réttindi þeirra og friðhelgi einkalífs. Lögreglan skal halda uppi öflugri löggæslu með það að markmiði. Þátttaka lögreglunnar í alþjóðlegu samstarfi er sífellt mikilvægari. Nýta ber öfluga landamæravörslu og greiningarstarf vegna hennar í meira mæli til að sporna við alþjóðlegri glæpastarfsemi. Almennu verður að telja að Schengen samstarfið hafi skipt Íslendinga miklu máli en þörf er á að skoða árangur samstarfsins vegna þróunar í Evrópu með hagsmuni Íslands að leiðarljósi. Styrkja þarf varnir Íslands þegar kemur að netöryggi en tryggja ber frjáls og opin netsamskipti. Sífellt á að vera í endurskoðun m.a. vegna persónuverndarsjónarmiða hvaða upplýsingar stjórnvöld og stofnanir eins og Þjóðskrá eru með um einstaklinga. Mikilvægt er að reglur á hverjum tíma séu skýrar. Fjölga þarf lögreglumönnum í landinu og þekking, þjálfun, starfsumhverfi og búnaður þarf að vera í takt við nútíma kröfur. Auknar og meiri kröfur eru nú gerðar vegna fjölgunar ferðamanna og til að tryggja öryggi ferðamanna og landsmanna svo og viðkvæmrar náttúru Íslands.

Leggja skal áherslu á réttindi, menntun og annan stuðning við fanga meðan á fangelsisvist stendur og við þá sem nýlega hafa lokið afplánun.

Fangelsisstofnanir verða að vera í stakk búnar til að sinna hlutverki sínu þannig að föngum sé veittur stuðningur til sjálfseflingar og betrunar. Stytta þarf verulega biðtíma dæmdra einstaklinga eftir að geta hafið afplánun.

Fjölga þarf og auka möguleika á fullnustu refsinga utan fangelsa, t.d. með samfélagsþjónustu og rafrænu eftirliti. Almennt þarf fælingamáttur gegn brotum að vera meiri, - ekki síst vegna kynferðisglæpa, alvarlegra ofbeldismála og fjársvikamála.

Leggja skal áherslu á fræðslu og forvarnir og aðstoð við þá sem hafa ánetjast áfengi eða fíkniefnum m.a. með auknu samstarfi lögreglu og heilbrigðisyfirvalda.

Almannavarnir og björgunarstarf

Landhelgisgæsla Íslands gegnir lykilhlutverki í aðgerðum í þágu almannavarna og björgunarstarfa. Tryggja verður öruggan starfsgrundvöll hennar og gera henni kleift að takast á við sífellt fjölbreyttari verkefni meðal annars með endurnýjun á þyrlum eins fljótt og unnt er.

Áfram skal unnið að markvissu og samhæfðu starfi ólíkra viðbragðsaðila almannavarna og björgunarstarfs. Mikilvægt er að tryggja réttaröryggi og réttindi sjálfbóðaliða í hjálparstarfi og koma menntun á þessu sviði inn í skólakerfið. Nýjar áskoranir fylgja miklum fjölda ferðamanna með auknu álagi og koma þarf til móts við það. Þá þarf einnig að tryggja björgunarsveitum nýja tekjuliði með beinni hlutdeild í tekjum af erlendum ferðamönnum. Framlag sjálfbóðaliða og félagssamtaka þeirra er ómetanlegt og mikilvægt að þeir fái stuðning svo ríkið þurfi ekki að taka yfir alla starfsemi á þessu sviði.